

**PEMBERITAHUAN PERTANYAAN BUKAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : BUKAN LISAN**

**DARIPADA : DATUK SERI IR. DR. WEE KA SIONG  
[AYER HITAM]**

**SOALAN**

Minta **MENTERI HAL EHWAL EKONOMI** menyatakan adakah paras garis kemiskinan yang digunakan untuk Semenanjung Malaysia serta Sabah dan Sarawak akan dikemaskini dan bagaimanakah Kerajaan melihat kritikan Pertubuhan Bangsa-Bangsa Bersatu (PBB) yang menyatakan kadar pendapatan garis kemiskinan negara adalah ketinggalan zaman.

**JAWAPAN**

Tuan Yang di-Pertua,

1. Seperti mana ahli Yang Berhormat sedia maklum, Yang Amat Berhormat Perdana Menteri telah menjawab mengenai isu kemiskinan di Malaysia di Dewan Rakyat pada 7 Oktober 2019 yang lalu.
2. Laporan *End of Mission Statements* oleh Pelapor Khas Pertubuhan Bangsa-Bangsa Bersatu (PBB), Profesor Philip Alston telah mengundang pelbagai reaksi dalam kalangan masyarakat. Kerajaan mengambil maklum laporan tersebut namun perlu dijelaskan di sini bahawa kadar kemiskinan rasmi di Malaysia dikira berdasarkan cerapan data Penyiasatan Pendapatan Isi Rumah (HIS – *Household Income Survey*) yang selaras dengan piawaian antarabangsa. Kementerian Hal Ehwal Ekonomi (MEA) telah meneliti laporan tersebut dan mendapati beberapa komen dan kenyataan beliau berikan tidak tepat. Metodologi penyiasatan beliau juga tidak menggunakan kaedah kajian secara saintifik dan empirikal.
3. Dalam mengukur kemiskinan mutlak di Malaysia, Kerajaan menggunakan Pendapatan Garis Kemiskinan (PGK). PGK merupakan pendapatan minimum yang diperlukan oleh sesebuah isi rumah bagi memenuhi keperluan asas makanan dan bukan makanan setiap ahlinya untuk membolehkan mereka hidup dalam keadaan sihat dan aktif. Kaedah ini mengambil kira ciri-ciri demografi isi rumah iaitu saiz ahli isi rumah, umur, jantina dan lokasi isi rumah (wilayah, negeri, bandar atau luar bandar).
4. PGK pada keseluruhannya merangkumi PGK makanan dan PGK bukan makanan. Penentuan keperluan PGK makanan adalah berasaskan kepada keperluan minimum tenaga atau kalori bagi setiap ahli isi rumah yang mengambil kira piramid makanan dan amalan pemakanan seimbang. PGK bukan makanan pula ditentukan oleh perbelanjaan sebenar berasaskan pola perbelanjaan isi rumah berpendapatan rendah di Malaysia yang merangkumi perbelanjaan pakaian, perumahan, pengangkutan dan keperluan-keperluan bukan makanan lain.

5. Sesebuah isi rumah dikategori sebagai miskin tegar sekiranya pendapatan bulanannya kurang daripada PGK makanan. Manakala, sesebuah isi rumah dikategori sebagai miskin sekiranya pendapatan bulanan mereka kurang daripada PGK keseluruhan (PGK makanan dan PGK bukan makanan).
6. Sumber data utama yang digunakan untuk menentukan nilai PGK Malaysia adalah Penyiasatan Pendapatan Isi Rumah dan Kemudahan Asas (PPIR&KA), Penyiasatan Perbelanjaan Isi Rumah (HES) dan data harga daripada Indeks Harga Pengguna oleh Jabatan Perangkaan Malaysia (DOSM).
7. PPIR&KA adalah berdasarkan *Canberra Group Handbook on Household Income Statistics, Second Edition* (2011) yang diterbitkan oleh *United Nations* dan diterima pakai di peringkat antarabangsa. PPIR&KA melibatkan persampelan lebih kurang 88 ribu isi rumah dari 6.97 juta isi rumah di Malaysia.
8. PGK dikemas kini dari semasa ke semasa selaras dengan perubahan harga barang dan perkhidmatan di peringkat wilayah (Semenanjung, Sabah dan Sarawak), negeri dan strata (bandar dan luar bandar). PGK yang telah dikemaskini akan dilaporkan bersama Laporan PPIR&KA yang diadakan 2 kali setiap lima tahun.
9. Untuk makluman ahli Yang Berhormat, berdasarkan penyiasatan pada tahun 2016, PGK keseluruhan di peringkat nasional adalah RM980 dan berdasarkan PGK tersebut, insiden kemiskinan mutlak di Malaysia adalah 0.4 peratus melibatkan 24,700 isi rumah.
10. Bagi menambah baik model PGK sedia ada, Kerajaan sebenarnya telahpun memulakan kajian semula PGK sejak bulan Mac 2019. Pelaksanaan kajian ini sedang giat dijalankan oleh Kementerian Hal Ehwal Ekonomi dengan kerjasama Jabatan Perangkaan Malaysia, Kementerian Kesihatan Malaysia serta jabatan dan agensi berkaitan.
11. Sementara itu, bagi pengukuran kemiskinan yang lebih inklusif selaras dengan amalan antarabangsa, Indeks Kemiskinan Pelbagai Dimensi (MPI) juga telah diperkenal dalam Kajian Separuh Penggal Rancangan Malaysia Kesebelas (KSP RMKe-11). MPI mengukur dan

memantau kemiskinan dalam perspektif pelbagai dimensi merangkumi kesihatan, pendidikan, taraf hidup (*living standard*) dan pendapatan.

12. Sehubungan ini, Kementerian Hal Ehwal Ekonomi akan meneruskan libat urus dengan pemegang taruh berkaitan pelaksanaan MPI dalam perancangan dan penggubalan dasar, strategi serta inisiatif ke arah pembasmian kemiskinan yang lebih komprehensif dan berkesan bermula pada Rancangan Malaysia Kedua Belas (RMKe-12).

13. Sementara itu, sepatimana ahli Yang Berhormat sedia maklum, Wawasan Kemakmuran Bersama 2030 (WKB) telah dilancarkan pada 5 Oktober 2019 yang lalu merupakan hala tuju baharu pembangunan ekonomi negara.

14. WKB diperkenalkan mengambil kira realiti setelah pelbagai dasar dilaksanakan termasuklah Wawasan 2020 di mana jurang ekonomi masih wujud, malah semakin melebar. Jurang ini sekiranya dibiarkan boleh menyebabkan kegelisahan dan ketegangan dalam masyarakat sekaligus merencatkan pertumbuhan ekonomi negara dan aspirasi perpaduan nasional.

15. Namun begitu, tidak dinafikan terdapat pencapaian pelaksanaan dasar-dasar terdahulu dalam bidang-bidang tertentu. Contohnya, bilangan profesional kini lebih ramai berbanding dahulu dan pendapatan isi rumah semakin meningkat. Terdapat juga mereka yang diberikan peluang berjaya mengembangkan perniagaan sehingga ke peringkat global. Jika dahulu, Kerajaan memberi fokus kepada peningkatan bilangan peluang berdasarkan prinsip kesaksamaan peluang (*equitability of opportunities*) terutamanya dalam bidang ekonomi, kini aspek kesaksamaan keberhasilan (*equitability of outcomes*) diberi penekanan dalam WKB. Peluang akan diberikan kepada mereka yang membuktikan kelayakan dan kemampuan. Bagi yang masih belum layak dan mampu, bantuan latihan serta sokongan sewajarnya akan diberikan bagi meningkatkan peluang kejayaan mereka.

16. Khusus bagi Sabah dan Sarawak, jurang pembangunan dengan wilayah-wilayah yang lebih maju akan ditangani secara holistik

mengambil kira keperluan kedua-dua negeri ini. Ini termasuklah melalui Teras Strategik 6, iaitu Keterangkuman Wilayah.

17. Di bawah Aktiviti Pertumbuhan Ekonomi Utama (*Key Economic Growth Activities* - KEGA), pemetaan kawasan titik panas tumpuan ekonomi (*economic hot spot*) yang berpotensi untuk dibangunkan akan diadakan. Ini bagi memastikan pembangunan ekonomi tidak berpusat di wilayah tertentu sahaja. Sebaliknya, ianya melibatkan pengagihan pembangunan kepada semua negeri di Malaysia secara saksama tanpa mengira lokasi mengikut keperluan.

18. Selain itu, Kerajaan akan terus memperkasa kumpulan minoriti termasuk Bumiputera Sarawak dan Anak Negeri Sabah terutamanya yang tinggal di kawasan pedalaman. Inisiatif akan terus dipertingkat bagi menangani kemiskinan disebabkan ketinggalan dalam aspek pendidikan, kemahiran dan keusahawanan, berikutnya akses yang terhad kepada peluang dan kemudahan asas.

19. Kerajaan yakin pelaksanaan Wawasan Kemakmuran Bersama akan dapat memastikan menjelang 2030, tiada kumpulan pendapatan isi rumah serta wilayah yang ketinggalan dan setiap rakyat dapat menikmati kemakmuran negara dan taraf hidup yang wajar.

Sekian, terima kasih.